

Rapport dalla sessiun dil cussegl da vischnaunca dils 25-07-2016

Tractanda 1

Approbaziun dil protocol dalla sessiun dils 18-04-2016

Il protocol dalla sessiun dils 18-04-2016 vegn approbaus en votaziun unanima cun engraziament.

Tractanda 2

Revisiun parziala dil regulativ da santeri e da sepultura

Urnas san vegnir satradas en fossas d'urnas en retscha, en nischas d'urnas, en fossas existentas ni en la fossa communabla (art. 15 regulativ da santeri e da sepultura). Pil pli vulan ils defuncts cremai vegnir setrai ella medema fossa sco il confamigliar. Quei sa tenor artechel 17 dil regulativ denton vegnir lubiu mo lu, sche la fossa ei buca existenta gia pli ditg che tschun onns. Il ruaus da fossa sedrezza denton adina suenter il temps digl'emprems defunct satrau.

La suprastanza communal vegn adina dapli dumandada da lubir il satrar ina urna era en fossas existentas pli ditg che tschun onns. Suenter madira ponderaziun ein la cumissiun da sepultura e la suprastanza communal vegni tier la conclusiun ch'ei basegna buca ina limitaziun dil cuoz che la fossa oriunda ei gia existenta.

La revisiun parziala dil regulativ da santeri e da sepultura preveda supplementarmein entginas midadas redacziunalas necessarias suenter la fusiun cun Schlans.

Cun 12 : 0 vuschs approbescha il cussegl da vischnaunca la revisiun parziala dil regulativ da santeri e da sepultura.

Tractanda 3

Damonda da credit per la sanaziun dalla via Pendas

La via Pendas ei gleiti puspei ina via naturala e buca ina via adeguata al temps dad oz. Suenter la realisaziun dalla sculptura Ognas sco era dil niev edific di Campadi Trun ei il temps avanzaus per era sanar igl access a quels dus bials implants. La punt sur la Ferrera ei medemamein en in fetg schliet stan. En connex cul project ei vegniu ponderau da sanar ella, denton ei semussau ch'in remplazzament ei pli convegnent e pli favoreivel.

La sanaziun preveda il tschancun denter il plaz da ballapei ed il tschancun gia sanau en connex cul niev campadi. Ils cuosts per la sanaziun dalla via Pendas (senza cuvrada) per la nova Punt Ferrera muntan à frs. 250'000.- net. L'asfaltaziun dalla via ei planisada la primavera 2017. Il credit per la cuvrada sa pia vegnir budgetaus el preventiv 2017.

Il cussegl da vischnaunca conceda il credit net da frs. 250'000.- per la sanaziun dalla Via Pendas e per la nova Punt Ferrera cun 12 : 0 vuschs.

Tractanda 4

Lescha davart il parcar sin territori communal

A Trun existan rodund 80 parcadis publics. Quels parcadis ein nudai el plan general d'avertura. Pigl entir territori communal exista denton negin concept da parcar, quei caschuna adina puspei problems e discussiuns.

Ina cumissiun predeliberonta ei vegnida installada ils 4 da matg 2015 entras il cussegl cun l'incarica d'elaborar in sboz per in uorden da parcar. La cumissiun predeliberonta e la

suprastonza communal proponan al cussegl ina lescha davart il parcar sin territori communal. Davart quella lescha meina il cussegl da vischnaunca intensiva discussiun.

Il cussegl da vischnaunca decida cun 7 : 4 vuschs ed ina abstenziun da buca entrar en tractanda. La fatschenta vegn renviada alla suprastonza communal.

Tractanda 5 Verificaziun dil resultat dalla votaziun dils 17-04-2016

Cusseglia **Rafael Guldemann** declara che Flurin Decurtins, Adrian Maissen ed el hagian sco commembers dalla cumissiun per verificaziun da votaziuns controllau ils resultats dallas votaziuns communalas dils 17 d'avrel 2016 ed anflau tut en uorden. En num dalla cumissiun propona Rafael Guldemann da verificar ils resultats publicai.

En votaziun unanima verifichescha il cussegl ils resultats publicai dalla votaziun dils 17-04-2016.

Tractanda 6 Pusseivladad da tschentar damondas

Dalla pusseivladad da tschentar damondas vegn fatg diever.

Per il cussegl da vischnaunca

Il president
Kurt Wolf

L'actuara
Sandra Gautschi